

Meeqqat atuarfiini atuartunut ilinniartitsisunullu atugarissaarneq pillugu apeqquaqaat aallaavigalugu oqallinnissamik siunnersuut.

(Inatsisartunut ilaasortaq Mette Arge-Hammeken, Naleraq)

Akissuteqaat

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut oqallisissiaq atuartut ileqqui, pimmatiginnittarneq ilinniartitsisullu sulinerminni atugaat unammillernarsigaluttuinnartut pillugit saqqummiussiffiusoq, qujassutigaa. Naalakkersuisut ukiuni kingullerni ajornartorsiutit taaneqartut pillugit suliniutit arlaqartut aallartippaat.

Ilinniartitaanerup aaqqissuusaanerata nakussassaaffigineqarnissaata kissaatigineqarnera aallaavigalugu Inatsisartut 2021-ip ukiaani meeqqat atuarfiat pillugu inatsisip allannguutissai akuersissutigaa. Inatsisip allannguutai suliniutinik arlaqartunik imaqarput, taakkununga ilaavoq isumassuinikkut attaveqarfissamik aaqqissuussinerit pillugit aalajangersagaq. Aalajangersakkami tassani kommunalbestyrelsen isumassuinikkut attaveqarfissamik pilersitsinissamut taassuminngalu ingerlatsinissamut pisussaaffilernissaa aalajangiunneqarpoq.

Aalajangersakkamut oqaaseqaatini atuarneqarsinnaavoq, isumassuinikkut attaveqaatip suliatigut unammillernartunik suliaqarnissaq siunertarinngikkaa, kisianni ajornartorsiutit allat, soorlu pimmatiginnittarneq, pinerlunniarneq imaluunniit ajornartorsiutit atuartup angerlarsimaffianut tunngassuteqartut atuartup ulluinnarni inuuneranut sunniuteqartartut, aammalu atuartup naammaginartumik atuarnissaminik qulakkeerinninnissaanut periarfissaanik ajornartorsiortitsisinnaasut. Allannguut 1. januar 2022-imi atuutilerpoq.

Inatsisartut 2019-ip upernaavani ataatsimiinnerminni tamarmiullutik isumaqatigiissutigaa, meeqqerivinni, atuarfinni inuusuttullu ilinniartitsisunullu pimmatiginnittarneq akiorniarlugu nuna tamakkerlugu periusissiamik tamakkiisumik ineriartortitsisoqassasoq.

Ilinniartitaanermut Aqutsisoqarfik maannakkut periusissiaq atuutilersinniarlugu suliniuteqarpoq, maannamullu kommunit tamakkerlugit aallartisaatitsillu kommunillu najukkaminni suliniutinik tulluarsaaneranni ikiorserniarlugit ataatsimiititsisareerluni. Suliniutinik taakkununga ingerlatsinermi Ilinniartitaanermut Aqutsisoqarfiup ingerlataanik upernaap ingerlanerani pimmatiginnittarneq akiorniarlugu periutsit pillugit webinarertitsisoqarpoq, aammalu nittartakkami iserasuaat.gl-imi pimmatiginnittarneq pillugu atortussianik saqqummersitsisoqarluni. Taakkua saniatigut SPS Ilinniarfissuarlu ataatsimeeqatigineqarput, pimmatiginnittarneq pillugu isiginnittaaseq nutaaq, periusissiap tunngavigisaa, saqqummiunneqarluni oqallisigineqarlunilu.

Pimmatiginnittarnermut akiuiniarluni atortussiaq “Kammagiitta”, meeqqerivinni kiisalu meeqqat atuarfiata nukarlernut alloriarfiani atorpeqartoq, maannakkut nutarterneqarpoq, nutarterneqarneralu Ilinniartitaanermut Aqutsisoqarfiup, Isumaginninnermik Aqutsisoqarfiup, Meeqqat Ikiortigit/ Red Barnet aammalu Dronning Mary Fonden-ip suleqatigiinnerisigut ingerlanneqarpoq. Taakkua saniatigut Ilinniartitaanermut Aqutsisoqarfiup Isumaginninnermut Aqutsisoqarfik suleqatigalugu oktoberimi pimmatiginnittarnermut akiuiniutit atuutsilersinniarnarat pillugu nuna tamakkerlugu peqataaffigineqartumik ataatsimeersuartitsivoq. Ataatsimeersuarnermi ilaatigut ulluinnarni meeqqerivinni, meeqqat atuarfiini inuusuttullu ilinniarsiini pimmatiginnittarneq akiorniarlugu suliniutinut assersuutit pillugit saqqummiussisoqarpoq. Ilanngullugu aamma ilisimatitsissutigineqarsinnaavoq, Ilinniartitaanermut Aqutsisoqarfik Pimmatiginnittarneq akiorniarlugu Ataatsimeersuarneq nangillugu atuarfiit pisortaat, atuarnissamut pinaaserneq atugarissaarnerlu qulequtaralugit isumasioqatigiisitsinikuusoq. Isumasioqatigiinnermi tassani atuanngitsoortarneq qanoq nassuiarneqassanersoq eqqartorneqarpoq, aammalu minnerunngitsumik atuartut atugarissaarnerat qanoq annertusitinneqarsinnaanersoq, atuartullu atuanngitsoortarnerat qanoq akiorniarneqassanersoq annikillisarneqassanersorlu.

Naggataatigut oqaatigineqarsinnaavoq, meeqqat atuarfiini sulinermi avatangiisini atugarisat pingaaruteqartorujussuummata – matumani timikkut tarnikkullu sulinermi atugarisat eqqarsaatigalugit. Taamaattumik kommunita ataasiakkaat, atuarfiit atuarfiillu pisortaasa sulisitsisutut sullivinni avatangiisit pillugit inatsisinik atuuttunik naammassinnittarnissaat aammalu ilaatigut sullivimmik nalilersuinernik inatsisitigut piumasarineqartunik ingerlatsisarnissaat pingaaruteqartuuvooq. Taakkua taamaallaat meeqqat atuarfiannut atuutinnigillat, nunatsinnili suliffeqarfinnut inuussutissarsiutinik tamani ingerlatsiviusunut tamanut atuuttuupput.

Naalakkersuisut oqaaseqaatit taakkua oqaaseqaatigalugit inimi matumani pissanganartumik angusaqarfiusumillu oqalliseqatigiinnissaq qilanaaraat.